

Vumm Stadtgadde

Omm letzde Moondaachmoie hott misch de Schorsch oogerufe unn gefroochd: Honnes, isch deet merr gern emol de Stadtgadde oogugge. Von dem hott su vill Gudes im Blättche gestonne, giehsde mol mett?

Ei klar, habb isch ze Antwort gewwe, wonn treffe merr uns unn wo?

Doo seet de Schorsch: Deet derrs heit middaach um drei Uhr basse? Mir treffe uns im Hof vunn de Anna Martini. Du konnsd doi Audo in dere ihrn Hof stelle, isch sellwer laaf doohie.

Gut Schorsch, saach isch, mir sehn uns.

Doo seeder noch: Es kann soi, dass isch e bissi später kumm. Isch muss noch emol uff die Sparkass, awwer isch eil misch.

Isch bin also korrz vor Drei vunn de Bohnhofstrooß in de Hof vunn de Anna Martini gefahrn, habb dess Audo uff oon vunn de Parkplätz gestellt, habbs abgeschlosse unn bin schunn emol bei de Dorschgong zum Stadtgadde gehumbeld. Misch hawwe noch schnell drei Buwe iwverhollt unn der oone seet: Da können Sie nicht durch, da ist abgesperrt. Seets unn schlubbd mett soine Kumbels omm Gitter vorbei in de Gadde, fort warn se.

Grad wie isch zum Audo zurigg bin kimmt de Schorsch dorschs grüße Door unn isch saach: Schorsch, doo kenne merr nitt dorsch, was mache merrn?

De Schorsch druff: Mir fahrn onn de Moo, du stellst in de Näh vumm Bootshaus dess Audo ab unn mir gugge uns die Sach vumm Domm her oo. Doo unne werdd halt aach abgesperrd soi, awwer vunn dort sehn merr e bissi mieh.

Also sinn merr hinners Bootshaus gefahrn, isch habbs Audo grad vor de Mootorm gestelltd, mir sinn die Eisbrech hoch gonge unn hawwe vunn dort geguggd. Nodierlich war aach vunn dere Seit de Stadtgadde abgesperrt, awwer mir wollde joo nitt in de Gadde enoi unn desdeweese hott uns dess nix ausgemacht. Mir hawwe e Weil geguggd unn donn seet de Schorsch: Also werklisch, de Stadtgadde iss e Schmuckstick worrn, den kenne die Macher de Flerschemer Leit unn aach de Fremme mett Stolz zeiche.

Mir hawwe allsfort geguggd. Owwe onn de Mauer iss e Bonk, uff dere hawwe merr die drei Buwe sitze seh, uffem Rase stiehn e paar Lieschestühl, gleich vorne iss e Pergola uffgebaud unn dere gescheiwwer lacht oom e Blummebeet oo.

De Schorsch hott misch gestumbd. Jetz kann isch moim Kättche verzähle, was isch geseh habb. Weil omm kummende Somsdaach werdd de Gadde joo oigeweihd, awwer die Fraa unn isch misse uffen Gebortsdaach nooch Massenem unn kenne nitt onn de Moo. Unn du, giehst du mol doohie?

Isch saach: Schorsch, du waaßt doch wies mett moine Laaferei iss unn aach mett der vunn de Fraa. Awwer unsern Nochber gieht bestimmt doohie unn vunn dem losse merr uns verzähle, wasses gewwe hott.

De Schorsch hott gegrint: Ja, in unserm Alder muss merr sisich ze helfe wisse.